

FAULA VI.

'L CAN E L' OSS.

Pr là sle rive d' Doira drint an foss :
 Soutrà tutt ant la nita , e mes rusià
 Un can-passavolant l' ha trouva n' oss :
 Ch' era l' avans d' un Tor dsfortunà ,
 'L qual robust , e grass , e su so bon ,
 Tacà dal mal dle bestie era crpà ;
 Vedend coula pitanssa an abandon ,
 Sto can ch' era un eroe pr l' aptit ,
 A s' è virassie antorn a sganasson.
 Fasìa dj strangojon tutt-aut che pcit :
 Tacava con le grinfe e con i dent ;
 Quand l' oss tutt dspolpà , tutt derelit
 Comenssa a fe un sospir , peui un lament ,
 Disend : ferma , crudel can affamà ,
 N' astu nen prou , sestu ancur-nen content ?
 Guarda ch'i' son un oss scarnificà :
 To frei l' han già mangià le polpe e l' cœur :
 I resto si mi sol tut desolà !

Ch'a t' fassa compassion sto me maleur ,
 Pensa che i l' erá un Tor desiderà
 Dai vsin ch' ero invidious dl me boneur ,
 A l'è già da tant temp ch' i' son cougià
 Drint a sta tampa , e gnun am dà rinforss ,
 Anssi dai me pì car son scarpisà ;
 I peus pì nè criè , nè fè gnun sforss :
 Im treuvo-sì distrut , e pr mia sort
 Espost a esse rusià da can e porss !
 Scouta , ai rispond 'l can..... it às gran tort
 A tñime sto discours : e sastu-nen ,
 Che tal è sempre stà 'l dritt dl pì fort ?
 Le cose andaran sempre su sto tren ,
 Prchè Natura a veul , che j' animai
 Pì gross mangiò i pì pcitt , ma bada ben ,
 Che i gross antra lor-aitri a s' mangio mai ;
 E venta che i cardlin coum a l'è d' giust
 A servo pr pitanssa ai Papa gai.
 Dl rest prchè conteme i to ds gust :
 Mi scouto nen loh quand j' hai aptit ;
 E peui sti nom d' pietà , son nom già frust.
 It deve esse content d' lò ch' i' t' hai dit :
 Se it veule piourè , pioura , am na fa poch ;
 Mi i seguito a rusiete , e tiro drit.
 Così l' ha fait , ma pr maleur un toch
 Dl' oss ch' a rusiava ai resta ant 'l gariot ,
 Piantà ant la garsamela coum un stoch.

Soussì v' serva d' esempi a voi giovnot,
Pr mai brayè la gent dsfortunà,
Nè mai tratè j' opress da Ottentot ;
Crdme , che tante cose già soutrà
Arsuscito quaich vota , e pio 'l vol ,
E tante ch' un je cred già tracanà ,
A peulo peui restene un dì ant 'l col !
